

EN regardant vers le país de France,  
 Un jour m'avint, a Dovre sur la mer,  
 Qu'il me souvint de la douce plaisance  
 Que souloye oudit pays trouver;  
 Si commençay de cueur a souspirer,  
 Combien certes que grant bien me faisoit  
 De voir France que mon cueur amer doit.

Je m'avisay que c'estoit non savance<sup>1</sup>  
 De telz souspirs dedens mon cueur garder,  
 Veu que je voy que la voye commence  
 De bonne paix, qui tous biens peut donner;  
 Pour ce, tournay en confort mon penser.  
 Mais non pourtant mon cueur ne se lassoit  
 De voir France que mon cueur amer doit.

Alors chargay en la nef d'Esperance  
 Tous mes souhaitz, en leur priant d'aler  
 Oultre la mer, sans faire demourance,  
 Et a France de me recommander.  
 Or nous doint Dieu bonne paix sans tarder!  
 Adonc auray loisir, mais qu'ainsi soit,  
 De voir France que mon cueur amer doit.

Paix est tresor qu'on ne peut trop loer.  
 Je hé guerre, point ne la doy prisier;  
 Destourbé<sup>2</sup> m'a longtemps, soit tort ou droit,  
 De voir France que mon cueur amer doit!